



16. november 2022

UKA 2022/29

**Kalaallit Nunaanni illunut inissianullu Radon-ip qinggorneranut illersuutilersuinissamut periarfissanik misissuititsinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinerup imarissavaa pisortat ingerlataanni illuni aamma nammineq illuni inissianilu pisortaniit pigineqartuni arlalinni periarfissarsiornissaq. Kingusinnerpaamik 2023-imi ukiaanerani ataatsimiinnermi misissuinermit innersuussutit saqqummiunneqassapput.**

(Inatsisartunut ilaasortaq, Mariane Paviasen, Inuit Ataqtigiit)

Inatsisartunut ilaasortap Mariane Paviasenip Inuit Ataqtigiinneersup nunatsinni illunut inissianullu Radonip qinggorneranut illersuutilersuinissamut periarfissanik misissuititsinissamut Naalakkersuisut peqquneqarnissaannik siunnersuutaa Siumumiit imaattumik oqaaseqarfigissavarput.

Siumup anguniarpaa nunatsinni innuttaasut tamarmik peqqinnartumik angerlarsimaffeqarnissaat, tamassumalu aamma minnerpaamik pisortat inaattaanni najugaqartut pisinnaatitaaffigissagaat isumaqarluta.

Naak radoni pinngoqqaataalluni pinngortitamilu pissusissamisoortutut nassaasaagaluartoq angerlarsimaffinnut amerlasuunut kingunerluuteqartitsinnaanera ilisimaneqarpoq. Radoni gassiugami nunap ataaniit quppatigut aniasarpoq, taamaalillunilu illunut inissianullu isaanissaa minnerusumik annerusumilluunniit aalleqqutaasinnaalluni. Radoni illuni inissianiluunniit silaannarmit sanilliullugu annertunerusumik nassaassaasarnera pissutissaqalersitsivoq angerlarsimaffinni illersuutilersuinissaq annertusassallugu pingaaruteqartuusooq, inuimmi peqqissusaannut kingunerluuteqarsinnaanera aarleqqutigineqarsinnaammat.

Naalakkersuisut akissuteqaamminni ersersippaat innuttaasut namminerisaminnik illuutillit aamma radonimut isumannaallisaalluni suliniuteqarnissanut taarsigassarsititsisarnerit tapersiissuteqartarnerillu aqqutigalugit periarfissaqartut, tamassumalu periarfissaasup atorluarneqarnissaanut suliniutit nukittorsartuarnissaannik Naalakkersuisut iliuuseqartuartaqariaqartut Siumumiit isumaqarpugut.

Maannamummi killiffik eqqarsaatigalugu, qulequtaq una kisiat pinngikkaluarlugu, innuttaasut namminerisamik illuutillit pitsanngorsaannissanut suliniutinut annikitsuinnarmik atuinerat qaammarsaassutaallunilu annertunerulersittariaqartoq Siumumiit kaammattuutigarpuit.

Pisortat inissiaataat eqqarsaatigalugit pissusissamisoortutut Siumumi isumaqarfigaarput inissiat najoruminartuunissaannut suliniarnernut apeqqut una aamma ilanngunneqartariaqartoq, taamaaliornikkut inissianik iluarsartuusseqqinnissat tamakkiisumik angusaqarfiusinnaanera qulakkeerneqarniassammat.



Siumumiit taamatut tunngavilersuuteqarluta Naalakkersuisut inissianik aningaasalersuisarnermut aaqqissuussinernik nalilersuinernut aallartinneqareersunut suliaqarnerannut apeqqutip massumap ilanngunneqarluni pinissaa naleqquttutut isumaqarfigaarput, taamaattumillu Naalakkersuisut allannguutissatut siunnersuutaat tapersiissuteqarfigaarput.

Siunnersuummut taamatut Siumumiit oqariartuuteqarluta siunnersuutip Sanaartornermut ataatsimiititaliami suliareqqinneqarnissaa innersuussutigaarput.

Anders Olsen, Siumut.